



Ofisina Sentral di Statistik

Informashon : (599 9) 461 1031 - Fax: 461 1696

Adrès: Fort Amsterdam s/n

E-mail: info@cbs.cw

Website: www.cbs.cw

Komunikado pa Prensa

Willemstad, 2 desèmber 2015

Preisnan pa konsumidó na Kòrsou: sèptèmber i òktober 2015

Preisnan na sèptèmber 0,4 porshento mas abou ku na ougùstùs

Preisnan na òktober 1,0 porshento mas abou ku na sèptèmber

E sifra índise di preis pa konsumidó na Kòrsou na luna di sèptèmber i òktober 2015 a baha ku respektivamente 0,4 i 1,0 porshento.

Si kompará e periodo di e último 12 luna te ku respektivamente sèptèmber i òktober 2015 ku mes periodo promé ku esei, ta resultá ku preisnan a subi ku un promedio di 0,3 i 0,1 porshento respektivamente.

Durante tantu luna di sèptèmber komo luna di òktober e kambionan di preis mas notabel a okurí den e kategorianan di konsumo “Bibienda” i “Transporte i komunikashon”.

Esaki por dedusí for di datonan ku a ser publiká awe dor di Ofisina Sentral di Statistik (CBS).

Desaroyo di preis durante lunanan di sèptèmber i òktober 2015

E sifra índise di preis pa konsumidó (CPI, “Consumer Price Index”) na Kòrsou a baha tantu na luna di sèptèmber komo na luna di òktober, esta ku 0,4 (di 124,8 pa 124,3) i 1,0 (di 124,3 pa 123,1) porshento respektivamente.

Durante luna di sèptèmber e desaroyo di preis a wòrdu influenshá prinsipalmente dor di bahada di tarifa di awa, tarifa di elektrisidat i preis di gas pa kushiná ku respektivamente 2, 4 i 20 porshento. Dor di esaki e kategoria di konsumo “Bibienda” a bira 1 porshento mas barata.

Durante luna di sèptèmber a la bes ta notabel ku gasolin i diesel (gasoil) a baha den preis ku 2 i 10 porshento respektivamente. Dor di esaki gastu di kore outo a baha ku 1,3 porshento i e kategoria di konsumo “Transporte i komunikashon” a bira 0,4 porshento mas barata.

E desaroyo di preis durante luna di òktober a wòrdu karakterisá prinsipalmente dor di bahada di tarifa di elektrisidat i preis di gasolin. Dor di bahada di tarifa di elektrisidat ku 8 porshento, e kategoria di konsumo “Bibienda” a bira 1,2 porshento mas barata. Seguidamente, e echo ku preis di gasolin a baha ku 20 porshento, a resultá den bahada di preis di e kategoria di konsumo “Transporte i komunikashon” ku 2,9 porshento.

Desaroyo di preis kompará ku un aña pasá i inflashon

E sifra índise pa konsumidó na sèptèmber (124,3) i òktober (123,1) 2015 tabata respektivamente 0,3 i 1,1 porshento menos kompará ku sèptèmber (124,7) i òktober (124,5) 2014. E sifra aki ta indiká ku e nivel di preis di produktonan i servisionan pa konsumidó na sèptèmber i òktober e aña aki tabata mas abou kompará ku mes un lunanan di aña pasá.

E promedio di diesdos luna di preis pa konsumidó na sèptèmber i òktober 2015 tabata respektivamente 0,3 i 0,1 porshento mas haltu ku na sèptèmber i òktober 2014. Esaki ta nifiká un subida di e promedio di diesdos luna di e sifra índise pa konsumidó di 123,6 pa 124,0 na sèptèmber i di 123,8 pa 123,9 na òktober.

E sifra di inflashon (0,3% na sèptèmber i 0,1% na òktober) ta duna segun CBS un bon bista di e pèrdida di forsa di kompra over un periodo di un aña i konsekuentemente ta wòrdu rekomendá komo instrumento pa indeksashon.

Inflashon ta reflehá pèrdida di balor di sèn, pues di forsa di kompra, dor di subida di preis di produkto i servisio pa e konsumidó. E sifra di inflashon pues ta duna un indikashon di e subida promedio di kosto di bida. Por konstatá ku inflashon na Kòrsou durante e delaster dos aña ta kontinuamente bou di 2 porshento, demonstrando un tendensia di bahada durante último 6 luna, te na un nivel bou di 1 porshento i awor asta aserkando 0 porshento.

Inflashon na Kòrsou den e ultimo 2 aña

